

Date – 30/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. **Larsap Gen. (Rtd.) Vijay Kumar Singh chuan rikrum thila che chhuak thei tura Mizo tawng ngeia inzirtirna first aid tutorial video 6 lai tlangzarh a ni chu lawmawm a tih thu a sawi.**
2. **Khawvel hmun dangte ang bawkin Mizoramah pawh Krismas hmang turin mipui an inpuahchah mek a, Aizawl khawpui chhunga veng hrang hrang te chuan an veng kawm leh hmun rem laite an cheimawi mek a ni.**
3. **Mizo Territorial Army lak hna chu tluang taka kalpui a ni a, kumthar January ni 18-ah written exam buatsaih a ni ang.**
4. **Cyclone Ditwah chu Bay of Bengal chhim thlang lam leh a kianga Sri Lanka leh Tamil Nadu hmar lam tuipui lamah darkar 6 kalta chung khan darkar khata kilometre nga zeta chakin hmar lam a pan.**

<><><>

GOVERNOR

Larsap Gen. (Rtd.) Vijay Kumar Singh chuan rikrum thila che chhuak thei tura Mizo tawng ngeia inzirtirna first aid tutorial video 6 lai tlangzarh a ni chu lawmawm a tih thu a sawi.

Nimin khan Indian Red Cross Society (IRCS), Mizoram State Branch Annual General Meeting hmasa ber chu Raj Bhawan Durbar Hall-ah neih a ni a, Larsap chuan rikrum thila che chhuak thei tura Mizo tawng ngeia inzirtirna first aid tutorial video 6 lai tlangzarh a ni chu lawmawm a tih thu sawiin, Red Cross Society member te chu infuih phur tawna mi tam tak hriat an hlawh theihna tura thawkrim turin a chah a. An thutkhawm leh huna hmasawna duhawm tak hmuh theih ngei a in beisei thu a sawi a ni.

IRCS Mizoram State Branch Annual General meeting-ah hian tun dinhmunah IRCS Mizoram State Branch hnuaiah life member 18 leh Aizawl khawpui chung College pathum - Govt. Aizawl College, Govt. Aizawl North College leh Govt. T. Romana College - atangin Youth Red Cross Unit member 100 chuang hret an awm mek thu tarlan niin, member neih belh dan turte sawi ho a ni a.

Aizawl District mai bakah district zawng zawngah Deputy Commissioner kaihhruai Red Cross Society din vek a nih theih nana hmalak nise tih niin, zau zawka tanlak a nih theih nan YMA leh NGO dangte nena thawh ho dan ngaihtuah nise an ti a. Remchang hmasa berah Huhliap short stay-ah first aid training buatsaih nise tih niin, half marathon buatsaih tha an ti bawk.

Meeting-ah chuan Mipuite'n tun aia zau zawka Red Cross Society an hmelhriata an rawn tel ve zel theih nana pawimawhte sawi ho a ni.



CHRISTMAS PREPERATION

Khawvel hmunn dangte ang bawkin, Mizoramah pawh Krismas hmang turin mipui an inpuahchah mek a, Aizawl khawpui chhunga veng hrang hrang te chuan an veng kawn leh hmun rem laite an cheimawi mek a ni.

Nizan khan kan palaiin Aizawl khawpui veng hrang hrang a tlawh kual a, Bawngkawn, Chanmari, Zarkawt, Tuikhuahtlang leh Sikulpuikawn te chu chei mek a ni a, cheimawi hna hi thawh zawh la ni chiah lo mah se tlawhtu an tam nghal hle a, mipuiin an ngaihlu hle tih a hriat.

Akashvani News Aizawl zawhna chhangin, kawn chei tlawhtu zinga pakhat chuan Krismas puala kawn chei awm thin chuan an nun a tih hlim thu leh, naupang, thalai leh nu leh pa thlengin an hlimpui tih a sawi a, thlasik boruak vawt leh khawlai chei chu a inhme hlein a hriat thu leh, krismas ti krismas tu zinga pakhat ni theia a hriat thu a sawi bawk.

Aizawl Municipal Corporation chuan kawn chei hi a thlawp a, kum danga a lo tih thin tawh ang bawkin kuminah pawh kawn chei lawmman a siam leh a ni.

Kawn chei te hi December thla tirah endik a ni ang a, endik laia a dinhmun a zirin a titha thlan chhuah a ni ang. Hemi vang hian kawnchei turte chu November chhunga chei zo hman tawh tura beisei an ni. Lawmman hi a cheitu - Local Council emaw Pawl hming emawa pek a ni ang. LC pakhat huam chhungah hmun khat aia tam chei a nih chuan hmun khat anga ngaih a ni anga, lawmman pakhat hlan a ni ang.

Lawmman hi pakhatna - Rs. Nuai 2 leh Citation; pahnihna - Rs. Nuai 1 sing 5 leh Citation; pathumna - Rs. Nuai 1 leh Citation bakah veng pasarih tan Consolation prize - Rs. 50,000 leh Citation pek an ni ang.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



TERRITORIAL ARMY

Mizo Territorial Army lak hna chu tluang taka kalpui a ni a, kumthar January ni 18-ah written exam buatsaih a ni ang.

Territorial Army, Aizawl Company Officer in Charge Lt. Col. Goldi Bora chuan nimina a pisaa chanchinbumite a kawmnaah he thu hi sawiin, Mizo Territorial Army atan mi 2700 chuangin hming an pek thu leh heng zinga tam takin physical leh medical test palflangin written exam an hmachhawn dawn a ti a. A zat chiah chu an lakkhawm mek thu sawiin chiang zawka an tarlan thuai theih a beisei thu a sawi a. Territorial Army lak hna kalpui mek chu a felfai thu leh an hotute pawh an lawm thu a sawi a ni.

Lt. Col. Goldi Bora chuan Mizoram chhunga mi chi hrang hrangin an hna lak mek thalaiten an hriat theihna turin a thehlar lamah tan an lak nasat thu leh lawmawm a tih thu a sawi a. Mizo mipuite tanrualnaah lawmthu sawiin hna lak kawngah pawh harsatna liantham han sawi tur a awm loh thu leh a felfai thu a sawi a. Mizo hmeichhia tam takin an dil ve chu lawmawm a tih thu a sawi bawk a ni.

Lt. Col. Goldi Bora chuan Territorial Army hna lak mekah Mizoram Youth Commission in written exam hmachhawn tur te tan Crash Course an siam chu lawmawm a tih thu leh an mamawh ang resource pawh an theih anga an pek dawn thu a sawi a. Hna lak ringawt an buaipui loh thu leh Aizawla an rawn luh tirh atangin hmun hrang hrangah vantlanga tana thil tha tiin outreach hun hrang hrang 27 lai an huaihawt tawh thu a sawi a ni.

<><><>

NEWS

Akashvani Aizawl Regional News Unit in Aizawl, Hnahthial, Chawngte, Vairengte leh Champhai North atana Part Time Correspondent a lak tur te interview chu Dec ni 3-ah neih a ni dawn a, diltute chu Dec ni 3 chawhma dar 10.30 ah document kimchang nen Office ah thlen kim tur a ni.

<><><>

MANN KI BAAT

Prime Minister Narendra Modi chuan vawiin Pathianni hian Akashvani-a 'Mann Ki Baat' programme ah ram chhung leh pawna cheng mipuite hnenah thuchah a sawi dawn.

Prime Minister hian chawhma dar 11 ah thuchah sawi tanin he hun hi thla tina neih thin radio programme vawi 128-na tur a ni. He hun hi Akashvani leh Doordarshan network zawng zawng, AIR News website leh Newsonair mobile app-ah te pek chhuah a ni dawn bakah AIR News, DD News, PMO, leh Ministry of Information and Broadcasting te YouTube channel-ah te pawh live-a pek chhuah a ni dawn bawk. Hindi-a pek chhuah a nih zawh veleh hian Akashvani chuan tualchhung tawng hrang hrangin a pe chhuak zui nghal dawn a ni.

<><><>

LADC

Lai Autonomous District Council inthlanpui atana inbuatsaihna kal zelah nimin khan District Election Officer Pu Donny Lalruatsanga hovin District Level Standing Committee an thukhawm a,

DEO chuan inthlanna fel fai leh luang tak a neih a nih theih nan Election Official-ten theihtawp an chhuah reng tih tarlangin, NGO - te nen an thawhhona a that thu a sawi a, inthlan Model Code of Conduct pawh khauh tak a kalpui mek a ni a ti a, Political Party lam pawhin an zawm tha hle nia a hriat thu a sawi.

DEO chuan India ramah mipuiten an aiawha roreltu an thlan thin angin inthlanna neih fo a ni a, hemi kawngah hian Official - te leh NGO - te inkarah thawhhon tha a awm zel a pawimawh tak zet a ni, a ti a, NGO, Political Party leh Mipuite thawhpuiah a sawm nghal a ni.



Cyclone Ditwah

Cyclone Ditwah chu Bay of Bengal chhim thlang lam leh a kianga Sri Lanka leh Tamil Nadu hmar lam tuipui lamah darkar 6 kalta chhung khan darkar khata kilometre nga zeta chakin hmar lam a pan. Hemi bialah hian a awmin, Karaikal khawchhak lam km 80 vel, Vedaranniyam atanga hmarchhak lam km 100 vela hla, Vedaranniyam chhim-chhak lam km 160 vela hlaah a awm a, Puducherry leh Chennai khawchhak lam km 250 vela hlaah a awm mek.

Darkar 24 chhungin North Tamil Nadu-Puducherry tuipui hmar lam hnaih takah a kal tura ngaih a ni a. Regional Met department atanga a lan danin, Cuddalore, Nagapattinam-ah RED ALERT pek a ni a. Chennai leh Kanchipuram telin tuipui kama district 12-ah ruahtui a tlak tam tur thu sawi a nih bakah State chhung hmun dangah pawh ruahtui a tla hnem dawn nia sawi a ani.

Ministry of Home Affairs chuan Coast Guard, State leh Union Territory-a thuneitute nen an inbiak reng thu an sawi a. Union Home Secretary chuan Tamil Nadu, Puducherry, Telangana leh Andhra Pradesh Chief Secretary-te nen inbiain, in ring reng turin an inhriattir a. Coast Guard chuan Tamil Nadu tuikamah lawng pathum leh thlawhtheihna pakhat an dah a, lawng tenau zawk te chu lawng chawlhna hmuna kir leh turin thu an pe bawk.

